

NEWS

EDITORIAL

RIETSPOPULISMUS

Wéi eng Mëtt?

Luc Caregari

Am Summer virun zwee Joer war et net méiglech se net blären ze héieren. Mee zënter se de Referendum „gewonnen“ hunn, ass et vermeintlech méi roueg ëm de „Wee2050/Nee2015“ ginn. Eng trügeresch Rou an där och e Kär Radikalisatioun läit.

Ween sech langweilt an e verreenen Dag op Facebook well verbréngen, deem ass nëmmen unzeroden d'Säit vun „Wee2050/Nee2015“ unzeklicken, e kleng kriteschen Kommentar ofzeginn an dann e puer Minutten ze waarden. Zimlech séier kritt Der garantéiert e klengen oder gréisseren Shitstorm lassgetrëppelt. De Problem ass deen: duerno ass kee méi schlau ginn. Well: De Modus Operandi vun „Wee2050/Nee2015“ ass genee dat. Pöbelen, ugräifen an all ofwäichend Meinung als ongültig erklären. Ween net mengt, datt déi franséisch Sprooch dat ultimativt Béist ass, ween sech net panesch an d'Box mecht virum Wuesstem vum Land an de Frontalieren an den Ausländer déi do nach kommen wäerten, dee gëtt zimlech séier als elitär, onpatriotesch, jee als Net-Lëtzebuerger ofgestempelt, deen net zou der selbsterklärter „politescher Mëtt gehéiert“.

Hannert dem ganzen Discours vun „Wee2050/Nee2015“ verstoppt sech schon laang kee konstruktiven Meinungsaustausch iwwert d'Sproocheproblematik, mee eng politesch rietspopulistesche Agenda.

Ween sech de Wee ukuckt den de „Wee2050/Nee2015“ zënter zwee Joer hannert sech bruet huet, kënnt net derlaanscht feststellen, datt sech d'Methoden wéi déi Organisatioun probéiert hir Usichten z'imposéieren ëmmer méi drastesch gi sinn. Neierdengs versichen se et mat enger Method, déi och d'AfD an Däitschland ëmmer nees opzitt: de perséinlechen Ugrëff an d'Diffamatioun vu Leit, déi net hirer Meinung sinn. Sou geschitt

mat der Presidentin vun der Asti, der Laura Zuccoli, déi anscheinend net dierft Expertin sinn an engem Comité iwwert d'Aféieren vum Franséischen an de Spillschoulen - well si anscheinend net neutral wär. An anere Wieder ze lénks, onpatriotesch an lëtzebuergfeindlech. Lo kann ee vun der Madame Zuccoli halen wat ee well, mee et dierf een eppes net vergiessen: Et war d'Asti déi scho viru Joerzénge Lëtzebuergesch als Integratiounssprooch gefërdert huet, a Coursen fir Ausländer organiséiert huet. Do gëtt also op eng Repräsentantin vun engem Veräin geklappt, ier s'iwwerhaapt eng Ausso gemaach huet. Ween esou virveruertelt kann einfach net eescht geholl ginn.

Sécher et gëtt Meinungsfräiheet, an déi deckt och konservativ Meinungen. Mee, et geet hei net drëm wat déi Meinung ass, et geet drëm wéi se ver-

mëttelt gëtt. Hannert dem ganzen Discours vu „Wee2050/Nee2015“ verstoppt sech schon laang kee konstruktiven Meinungsaustausch iwwert d'Sproocheproblematik mee eng politesch rietspopulistesche Agenda. An dat ass e falscht Spill, dat Rietspopulisten a ganz Europa sou bedriewen. Ënnert dem Deckmantel vun der Meinungsfräiheet Minderheiten diskriminéieren. Den Thilo Sarrazin huet et virgemaach, a „Wee2050/Nee2015“ afen him - an nach vilen aneren - et no. Sécher, s'als „völkisch-nationalistisch“ ze bezeichnen (wéi verschidde vun hire Géigner an de sozialen Netzwierker et maachen) ass iwwert d'Ziel eraus geschoss. Well am Fong perpetuéieren „Wee2050/Nee2015“ nëmmen eng al Traditioun vun der extrême droite à la luxembourgeoise: d'Sproocheproblematik mëssbrauchen fir Ausländer a politesch Géigner unzegräifen. Wat bleift hinnen soss anescht iwwreg an engem Land mat 47,7 Prozent Ausländer?

An dat ass am Fong schued. Well et gëtt effektiv eng Sproocheproblematik hei am Land iwwert déi mer schwätzen müssen. An jo, d'Léisungen vun dëser Regierung sinn och vläit net déi besch. Mee wien sou agéiert wéi „Wee2050/Nee2015“, blockéiert all rationell Diskussioun an huet sech domat selwer disqualifizéiert.



FOTO: © SCREENSHOT „WEE2050/NEE2015“

NEWS

Élections communales: Peut mieux faire p. 3

REGARDS

Universität Luxemburg: Leise Kritik S. 4

Linke Parteien in der Krise (3/4): Rotwein pur S. 6

Fünf Fragen an: Nadine Tornambé-Duchamp S. 7

Une autre politique communale est possible (3/3):

Communes, comuns, communisme p. 8

Kriminalisierung von NGOs:

„Ein feindseliges Klima“ S. 10

Wider den Kunststoffmüll:

Kann Plastik bio sein? S. 12

Cape Ettelbruck: Ratisser large p. 14

Corruption en Tunisie:

Sous fond de rivalités politiques p. 16

Coverfoto: Susanne Friedel @ SOS MEDITERRANEE